

PENGUKUHAN SEKTOR INDUSTRI TERNAKAN

JABATAN PERKHIDMATAN VETERINAR

Industri ternakan di Malaysia merupakan satu cabang penting dalam pembangunan pertanian negara dan merupakan antara penyumbang utama sebagai sumber protein utama negara. Prestasi sektor ternakan menunjukkan pertumbuhan positif pada tahun 2023. Nilai ditambah sektor ini bagi suku keempat tahun 2023 berkembang sebanyak 3.5 peratus kepada RM4.0 bilion yang memberi sumbangan kepada ekonomi negara sebanyak 1.0 peratus.

Dari aspek pencapaian kadar sara diri (SSR) bagi tahun 2022, negara telah mencapai 109.0 peratus bagi subsektor telur ayam/itik. Manakala SSR bagi daging ayam/itik mencapai 94.4 peratus, susu segar sebanyak 57.3 peratus dan daging lembu/kerbau 14.7 peratus.

Jumlah perdagangan ternakan dan hasil ternakan berkembang sebanyak 22.0 peratus kepada RM15.84 bilion bagi tahun 2022 (RM12.35 bilion pada tahun 2021). Peningkatan ini disumbangkan terutamanya oleh import dengan nilai RM12.37 bilion berbanding eksport RM3.48 bilion. Tren defisit bagi sektor ternakan dilihat kekal sejak dua tahun kebelakang dengan nilai import tahun 2021 adalah RM8,960.67 dan eksport RM3,390.68 manakala nilai import tahun 2020 adalah RM8,138.98 dan eksport RM3,132.89. Tren ini memberi cabaran kepada Jabatan Perkhidmatan Veterinar (DVS), khususnya dalam meningkatkan eksport ternakan dan produk ternakan di samping mengurangkan kebergantungan kepada import. Justeru, pelbagai strategi yang lebih holistik dirancang dalam menangani cabaran tersebut.

Krisis ekonomi global rentetan daripada wabak pandemik COVID-19 memberi kesan kepada bekalan daging ayam dan telur ayam di Malaysia akibat peningkatan kos pengeluaran ternakan. Bagi tujuan menangani isu kesan kenaikan kos dan menstabilkan bekalan ayam dan telur, Kerajaan telah memperuntukkan sebanyak RM2.3 bilion bagi pemberian subsidi ayam dan telur kepada penternak mengikut kategori yang telah ditetapkan bermula pada 9 Februari 2022. Dalam hal ini, DVS sentiasa bekerjasama dengan pihak industri ayam bagi memastikan ianya kekal mampan, sekaligus menstabilkan bekalan secara berterusan.

Dasar Agromakanan Negara 2021-2030 (DAN 2.0) telah menetapkan sasaran 50.0 peratus SSR bagi daging lembu/kerbau, 30.0 peratus bagi daging kambing/bebiri dan 100.0 peratus bagi susu segar menjelang tahun 2030. Dalam mencapai sasaran yang ditetapkan, industri ruminan menghadapi pelbagai cabaran sama ada di peringkat antarabangsa mahupun domestik. Antara cabaran yang dihadapi adalah lembu fider import yang mahal, kos pengeluaran yang tinggi, sumber negara bagi pembekalan ternakan import yang terhad, Barrier to Entry yang melibatkan keperluan modal yang

tinggi, perundangan (halal, pensijilan) serta peralatan dan mesin, kekangan tanah, kurang efektif dan kos tinggi kepada pekebun kecil.

Usaha bersepadu berasaskan pendekatan dan hala tuju yang lebih konstruktif telah dirancang oleh DVS dengan membangunkan Pelan Strategik Pembangunan Industri Pedaging Negara (BIF Plan) 2021-2025 melalui 12 hala tuju strategik dan Pelan Strategik Pembangunan Industri Tenusu Negara (Dairy Plan) 2021-2025 melalui lapan (8) hala tuju strategik. Kedua-dua plan strategik berperanan memperkemas dan memperkukuh industri pedaging dan tenusu negara ke arah meningkatkan pengeluaran dan SSR daging dan susu negara, bagi mencapai agenda keterjaminan makanan.

Antara program yang telah dan sedang dilaksanakan dalam tempoh pelaksanaan DAN 2.0 adalah:

- (i) Program Peningkatan Ruminan melalui konsep Public Private Partnership (PPP);
- (ii) Program Rezeki Ternak Ruminan melalui bantuan ternakan dengan konsep geran padanan;
- (iii) Projek Insentif Galakan Peningkatan Produktiviti Lembu Pedaging Ke Arah Purata Kadar Kelahiran Nasional 60% (PIKK60%) melalui pemberian geran kepada penternak ruminan yang layak dan berpotensi;
- (iv) Program Ladang Satelit Nasional (LSN) yang meliputi pembinaan kandang lembu serta Pembangunan infrastruktur di atas tanah kerajaan untuk disewakan kepada peserta/penternak yang layak;
- (v) Program Pembangunan Taman Kekal Pengeluaran Ruminan (TKPR) melalui penyediaan dan pembinaan infrastruktur asas ternakan lembu tenusu bagi mengoptimumkan penggunaan tanah milik DVS dan menangani isu tanah terbiar; dan
- (vi) Program Perluas Penternakan Lembu melalui penyatuan pengurusan penternakan dan pemasaran lembu pedaging yang diusahakan oleh Pertubuhan Peladang secara bersepadu sekaligus meningkatkan kapasiti lembu fidlot.

Pada tahun 2023, KPKM memberi penekanan kepada hala tuju perluasan ternakan lembu fidlot melalui beberapa strategi, iaitu meneruskan operasi ladang satelit di tujuh (7) negeri di Semenanjung Malaysia. Pengusaha fidlot dapat beroperasi di kawasan strategik dengan kos yang lebih rendah melalui usaha kerajaan membina dan menyewakan unit kandang serta 30 ekar kawasan pastura pada harga yang bersesuaian. Hasilnya, pencapaian bagi penternakan lembu fidlot boleh dilihat daripada tiga (3) aspek utama iaitu;

- (i) Pengeluaran lembu fidlot tempatan sebanyak 7,531.5 tan matrik (52,085 ekor lembu fider) oleh DVS;
- (ii) Pengurangan kos modal pengusaha fidlot bagi 42 pengusaha di bawah DVS; dan
- (iii) Peningkatan daya saing penternak fidlot tempatan meliputi 72 LSN di bawah DVS dengan keluasan 9,097.7 hektar.

Antara fokus utama lain yang menjadi tumpuan pada tahun 2023 adalah menggalakkan peningkatan pengeluaran daging premium dari baka lembu Wagyu dan Hibrid Sado; insentif bagi menggalakkan peningkatan produktiviti lembu pedaging ke arah purata kadar kelahiran nasional 60% dan penumpuan kearah segmen pasaran daging lembu yang lebih meluas seperti pasaran Hotel, Restoran dan Catering (HoReCa).

Komitmen KPKM untuk memperkukuh industri ternakan negara terus diperkemas dengan melihat semula penetapan sasaran dan strategi jangka masa sederhana dan jangka masa panjang. Dalam hal ini, kerjasama semua pemegang taruh di sepanjang rantai industri ternakan amat signifikan bagi kejayaan pelaksanaan strategi dan hala tuju yang digariskan.